

FM 2022/43 - Inoqarfinnut isorliunerusuniittunut nunaqarfinnullu periarfissat pillugit inuttut ilanngaammut, nuna tamakkerlugu akileraarutip appasinneruneratigit, ilinniarnermilu taarsigassarsiniarnermi taarsersuinermit iluaqusersuinerit il. il. nunatsinni atulersinnaanerit pillugu Norgemi Finnmarkimut atugassaritinneqartut isumassarsiorfigalugit Naalakkersuisut misissueqqullugit peqquneqarnissaannik Inatsisartut aalajangiiffigisassaattut siunnersuut. Misissuinermi periutsit taamaattut nunatsinni atuutsinneqalersinnaanerannut aningaasaqarnikkut allaffissornikkullu pisortanut, namminersortunut innuttaasunullu aningaasatigit malitsigisassaat ilaatinneqassapput. Misissuinerup inerneru kingusinnerpaamik UPA2023-imi inatsisartunut agguanneqariissapput.

(Inatsisartuni ilaasortaq Jess Svane, Siumut)

Akissuteqaat

(Aningaasaqarnermut Naligiissitaanermullu Naalakkersuisoq)

Siullermeerneqarnera

Siunnersuuteqartoq nunaqarfiit isorliunerusullu sullinneqarnerat eqqarsaatigeqqinneqassasoq aalajangiiffigisassatut siunnersuummik saqqummiussaqaarsimavoq. Aaqqiissutissatut siunnersuutaasinnaasut pillugit siunnersuummut isummersuutinullu tunngavilersuutit Naalakkersuisut isumaat malillugu soqutiginaateqarput.

Taamaattoqarmat nunatsinni piffinni assigiinngitsuni innuttaasut inuuniarnerminni aningaasaqarnikkut atugassarititaannut pitsaanagerusumik takunnissinnaalernissaq pisariaqartinneqarmat Naalakkersuisut isumaqataapput. Taamatut pisariaqartitsineq ukiuni aggersuni suli annerulissaaq, tassani innuttaasut katitigaanerit malunnartumik allannguuteqartussaammat.

Siumoortumik naatsorsuinerup siunissami sulisinnaassusillit ukiuni 10-15-ini malunnartumik ikileriarumaartut takutippaa. Tamanna nunarput tamakkerlugu suliffeqarnermut suli ilungersunarnerulissaaq, minnerunngitsumik sumiiffinni suliassaqarfinnilu illumikkut sulisussanik pissarniarluni ajornartorsiorfioreersuni. Assersuutigalugu ilinniartitsisutut atorfiit atorfiillu isumaginninnerup peqqinnissaqarfiullu iluaniittut, taakkunanimi sulisussanik pisariaqartitanik pissarsiorarneq sulisoqaannarnissarlu ajornartorsiutaareermat.

Innuttaasut sulisussarsiarineranni sulisoriinnarniarnerannilu Akileraartarnermut malittarisassat aammalu ilinniarnermi taarsigassarsiat akilersornerini isiginiarneqarsinnaaneri periarfissaavoq, soorlu siunnersuuteqartup innersuussutigigaa. Naalakkersuisulli siammasinnerusumik isiginninnissaq innersuussutigissavaat. Siunissami nioqqtissanik pilersuinermit, nioqqtissat illoqarfinnut nunaqarfinnullu naleqqiullugu akinik misissuinissamat, najugaqarnermi aningaasartuutitut, inuutissarsiornermi maannakkut atuuttunut aaqqissuussinermit, kiisalu piitsuussutsimik killissarititami suliaqarnermi isummersuutaasinnaapput.

Tamanna tunngavigalugu Naalakkersuisut siunnersuutigivaat nassuiaat kissaatigineqartoq aningaasaqarnermut iliussissaannarnik isiginnissanngitsoq, aammali iliuserineqarsinnaasunik allanik sammisaqassasoq. Ataqatigiittoqarnissaa pisariaqartinneqartoq qulakkeerniarlugu paasissutissat, misissueqqissaarnerit isummersuutillu suliniutinut aallartereersunut attuumassutilinnut allanut ilaasut sapinngisamik nassuiaammi pissarsiariniarneqartassapput.

Tamatuma kingunerisaanik allannguutissatut siunnersuut matumuuna saqqummiunneqarpoq: **”Innuttaasut katitigaanermikkut allanngoriartornerat ilutigalugu ilaatigut ilinniartitaanermut, peqqinnissaqarfimmuut isumaginnittoqarfimmullu suliaasaqarfinni pisortat sullissinerisa piginnarnissaannut periarfissanik misissueqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Misissuinerimi aaqquissuussinerit pilersinnaasut qanoq isillugit atortussanngortinneqarsinnaanersut nassuiaaffigineqassapput, tassanilu Norgemi Finmarkenimi nunap immikkoortuini massakkut suliniutit qanoq attuumassuteqarnerisut naliliiffigalugu. Misissuinerimi pisortanut, inuussutissarsiortunut innuttaasunullu, tassunga ilanngullugu akileraartarnermi ilanngaateqarnissamut periarfissat, nuna tamakkerlugu akileraarut appasinnerusoq, ilinniagaqarnermi taarsigassarsiat akilersorneqartarneranni pitsaasunik periarfissat il. il., aningaasaqarnikkut allaffissornikkullu sunniutissat naatsorsuutaasut naliliiffigineqassapput. Misissuineq kingusinnerpaamik UKA2023-mi Inatsisartunut agguanneqassaaq.**